

Serahkan kami kerusi dimenangi Umno, Muhyiddin beritahu PAS
Free Malaysia Today
Okt 2, 2016
Zulkifli Sulong

Muhyiddin buat pertama kali menyampaikan ceramah dalam program PAS semalam dalam usaha meyakinkan parti itu bekerjasama dengan pembangkang lain.

KEMAMAN: Dalam ceramah yang buat pertama kali di atas pentas PAS, Tan Sri Muhyiddin Yassin semalam menawarkan kerjasama antara Parti Pribumi Bersatu Malaysia (PPBM) dengan PAS dan Pakatan Harapan bagi memastikan satu lawan satu menentang Barisan Nasional (BN) pada pilihan raya umum (PRU) akan datang.

Presiden PPBM itu memberikan 3 jenis kerjasama yang boleh berlaku antara mereka iaitu pembentukan barisan pembangkang, kerjasama antara PPBM, PAS dan Pakatan Harapan (PH), atau kerjasama pilihan raya (electoral pact) antara kesemua mereka.

“Kita yakin kerjasama ini akan menggoncang orang Putrajaya dan silap-silap dia tidak akan buat pilihan raya sampai bila-bila,” kata Muhyiddin yang berceramah di atas pentas PAS di Kemaman, Terengganu, malam tadi.

Dalam ucapan itu, Muhyiddin turut mengesahkan pertemuannya dengan Presiden PAS, Datuk Seri Abdul Hadi Awang beberapa minggu lalu, yang menurutnya berjalan dengan baik.

Muhyiddin juga mengaku sudah beberapa kali bertemu dengan Timbalan Presiden PAS Datuk Tuan Ibrahim Tuan Man dan Pengarah Pilihan Raya PAS, Datuk Mustafa Ali, untuk tujuan yang sama.

Muhyiddin yakin, melalui perbincangan dengan semua pihak itu, pertandingan satu lawan satu yang dicita-citakan itu akan boleh berlaku dalam PRU nanti.

“Ini adalah jihad untuk kita memelihara masalah Malaysia di masa depan,” kata Muhyiddin di depan kepimpinan dan penyokong PAS Terengganu

Walaupun rata-rata PH yang dianggotai PKR, DAP dan Amanah bersetuju bekerjasama dengan PPBM, pendirian PAS dilihat masih samar, dengan tiada keputusan jelas daripada pucuk pimpinan sama ada mahu mengadakan kerjasama dengan parti yang berusia kurang sebulan itu.

PAS juga dilihat kurang senang dengan kehadiran DAP dan Amanah, sementara masih menjalinkan hubungan dengan PKR.

'Beri kami kubu Umno'

Menurut Muhyiddin, partinya sedia bekerjasama dan berunding dengan PAS termasuk pembahagian kerusi pilihan raya.

“Bukan kita nak ambil kerusi yang sudah dimenangi PAS tetapi kerusi yang Umno menang itu, bagilah kepada kami untuk kami kalahkan Umno.

“Kita akan pastikan Umno tewas dan kini menang dan membentuk kerajaan bersama,” kata Muhyiddin.

Menurut Muhyiddin, kerja mengalahkan BN tidak mungkin dilakukan satu parti sahaja sama ada PPBM, PAS atau PH, tetapi boleh dilakukan melalui gabungan semua parti.

“Saya tahu cabaran bagi Bersatu (PPBM) amat besar, begitu juga PAS, tetapi jika niat dan nawaitu kita mahu menjatuhkan pemimpin yang tidak beramanah ini, kita tidak boleh lihat perbezaan antara kita.

“Bersatu bersedia bekerjasama dengan PAS dalam apa-apa keadaan sekali pun,” kata Muhyiddin di majlis itu.

Muhyiddin pada Selasa lepas memberitahu beberapa bakal pemimpin PPBM Kelantan kesediaan parti itu berperanan menjadi penyatu PAS dan pembangkang lain.

“Kita yakin boleh menjadi ‘glue’ kepada PAS agar terus bersama melawan BN dalam pilihan raya nanti,” katanya dalam pertemuan di pejabatnya di Damansara.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/10/02/serahkan-kami-kerusi-dimenangi-umno-muhyiddin-beritahu-pas/>